

Babs dad uffants-cucu survegnan in chasti sch'els fan in test

Nagina soluziun entaifer la lescha davart analisis geneticas

DA CLAUDIA CADRUVI / ANR

■ **In um che crai d'esser bab dad in uffant ha strusch letgas sche la mamma refusa ina analisa genetica. El n'ha betg il dretg da pretender scleriment. La revisiun da la lescha davart analisis geneticas pegiurescha anc la situaziun. Sch'in bab lascha tuttina far in test da paternitad po el uss perfin vegnir chastià.** D'ina situaziun absurda discorra cusseglier dals chantuns *Claude Janiak* (ps/BL). Cumpareglià cun auters pajais europeics haja la Svizra las reglas las pli rigurusas. Ier ha la chombra pitschna tractà la revisiun da la lescha davart analisis geneticas tar umans. Fin uss vegniva chastià be il labor ch'exequiva in test da paternitad encunter la veglia da la mamma. Ma damai ch'ins po senz'auter incumbensar via internet in labor en l'exteriur ha la chombra pitschna decidì ier sco segund cussegel da chastiar er ils umens che la-

schan far il test senza consentiment dals pertutgads.

Discriminaziun dals babs biologics

D'ina absurditad ha Janiak discurrì perquai che pliras partidas han il dretg da laschar sclerir giu la paternitad – il bab biologic però betg. Uschia po per exempel ina dretgira ordinar in'analisa genetica per fastizar tgi ch'è il bab biologic. Era la mamma u l'uffant sez han il dretg da pretender ina tala. Plinavant po il consort, sch'el ha dubi dad esser il bab, purtar plant entaifer in onn. Sulet il bab biologic na po interprender nagut senza il consentiment dals pertutgads.

Il tribunal federal ha gia confermà ch'i saja in dretg fundamental da l'uffant da laschar sclerir la paternitad, ha ditg Janiak. Schebain er il bab biologic possedia in tal dretg fundamental n'haja la dretgira anc mai gè da decider.

Hannes Germann (pps/SH) deplore-scha ch'in um vegn tractà sco criminal

sch'el less savair sch'el saja bab. «Uschiglio han ins dapertut il dretg da savair tut.» En quel regard vegnian ils babs biologics discriminads. Tgi che lascha far ina analisa genetica encunter la veglia dals pertutgads po, tenor veglia dad omaduas chombras parlamentaras, vegnir chastià cun praschun u cun in chasti pecuniar.

Janiak planisescha ina moziun

Sco pledader da cumissiun ha *Ruedi Noser* (pld/ZH) explitgà che la dumonda davart ils babs biologics saja memia cumplexa per la pudair tractar en rama da la lescha davart analisis geneticas. Ins stoppia numnadamain era definir tge che capitia sch'ina analisa genetica demussia ch'il consort – ch'è bab confirm la lescha – na saja betg il bab biologic. Perquai stoppia la chausa vegnir reglada entaifer il dretg da famiglia. Janiak ha gia annunzià ch'el inoltreschia ina moziun per metter en rodla midadas a favur dals babs biologics.



Il pledader da la cumissiun Ruedi Noser en discurs cun cusseglier federal Alain Berset.